



方山先生文錄卷之二十一

墓表

墓碣銘

墓誌銘

靜菴蕭先生墓表

會稽之陰有大儒曰靜菴先生者稟賦不凡少即穎異甫踰十齡修詞藝文已卓然成童年十七即厭棄之從陽明王先生游講明聖學窮極指歸體認踐履不務口耳在諸生中甚為提學副使趙公寬所賞識弘治甲子楊文恪公廉為浙江鄉試考官得先生文大驚謂學有本原才堪經濟取置第一自是遂以文名四方寔先生所不屑也登正德甲戌進士選授監

察御史時方以言為諱先生劾奏兵部尚書王瓊雖
小有才多挾私妄作都督江彬黃緣投托蔓將難圖
申救胡副使世寧孤忠為國力剪強藩封章慷慨天
下想聞其風采非徒事聲容者比奉 命巡山海諸
關值邊備久弛將官怠縱先生遍歷邊徼修廢振墜
相機設備廣樹材木多為覆塹虜騎不敢長驅相顧
喙息會傳奉 武宗將出邊捕虎總鎮以下遞相掎
剋先生上疏言 陛下不當賤民命而貴異物玩細
娛而忘遠圖因及官司掎剋兵民疾苦之狀留中不
報總兵戴欽鎮守王忻圖中傷之用事者曰蕭御史

無隙乃止嘗疾馳黃花鎮啟視倉糧苴礫居半且侵
剋累鉅萬守將盡論如法巨鎗溫祥在司禮監有權
令二倅折簡為請先生併逮倅治之邊境悚然士始
獲餉先是權貴人多冒奪士卒首功前御史盡為紀
驗先生悉奏奪之江彬錢寧忿然論于先生之前先
生曰某地某地相距幾百里某乃同日殺虜彼此獲
功豈能二三其身邪二人語塞巡邊代還盡圖山川
形勢量地夷險敘著機宜方略緩急有虜按圖可議
戰守彭都御史澤上其功且薦可大用王瓊以夙憾
不為覆奏先生亦初無意於論功復命巡按雲南值

左脛為邊風所中疾作太孺人憂之遂䟽請歸省踰
年南畿缺提學御史乃膺簡命先生素以人才廢壞
為憂至則振起科條以身範物先德行而後文藝士
有可進者先生降色溫言懇懇誘掖語及理道反覆
推明其或有不率教者縱其文擬楊馬詞並莊騷亦
在所必黜重以權貴人請之不聽也其諸官師之賢
否生民之利病往昔之忠賢山林之遺逸靡不悉心
咨訪抑揚興革究其所措意直欲挽回陋習躋之隆
古而與人為善之誠惻然可掬此豈可與流俗道哉
故南士有陳泰山蕭北斗之謠陳謂先提學陳恭愍

公選也尋陞河南按察副使仍董學政凡所施設一
如南畿臨穎有大臣在內閣以故怨搆誣其鄉人谷
生者欲假手甘心先生廉知其故不為處乃復為其
子弟甥婿請託又弗許由是憾甚嗾言事者劾先生
連及廣東提學副使魏先生校二先生皆當世名儒
䟽下吏部恐拂臨穎意乃量移先生於湖廣魏於江
西皆兵備副使南御史上䟽謂二人皆長才碩學宜
大用不宜左調值臨穎去位乃更先生廣東魏河南
仍各為提學副使廣學政久弛魏以過嚴獲譴先生
繼之不少貶復為怨者所搆先生不辯唯䟽求解職

竟復論改調尋丁太孺人憂年且五十而哀慕不已
蓋寢就衰矣自是遂不復出嘉靖甲午八月某日以
疾卒于家距生成化庚子某月日年五十有五疾革
時令子弟扶坐堂上曰吾平生不欺使吾一見天日
耳子泣請遺命曰為好人餘一無所言先生諱鳴鳳
字子雖紹興山陰縣人學者稱為靜菴先生父諱昱
任山東高密縣知縣以先生貴贈監察御史母茅氏
封孺人娶周氏封亦如之子男二曰勉曰飭皆有文
行為國子生女一適錢塘縣學生田肯搢孫男三承
方縣學生餘皆讀書習禮先生所著有靜菴文錄詩

錄教錄杜詩註若干卷六經方次第有說創草未就
先生瓌傑廓落廉靖方介終身未嘗畜媵侍靜處一
室浩然天游常正襟危坐或獨步中庭遇風月清朗
則自喜曰此吾儒受用處也其所自得者如此故其
於出處之際百折不回雖識者謂其足以大受惜其
不為公卿而先生之視功名事業則真若浮雲之過
太虛也嗚呼斯世有如先生者幾人哉先生卒之二
十年其門人武進薛應旂亦以視學過先生里第拜
遺像而尋宿草之墓焉勉飭以墓未有表遂屬之余
謂先生之化今傳後固不待表而見然亦自有不容

已者因敘次先生之履歷與所嘗聞於縉紳先生者而表於其墓曰嗚呼先生藏於茲丘其封不滿數尺而關係世風者則何其大哉余爲南考功時西磐張公爲尚書檢察庶寮唏噓嗟嘆者久之曰士失養於學校而顧稽之於既仕殆猶使不教之民戰也宜其鮮完人矣近時如蕭子雖魏子才之爲提學其人豈易得哉然則二先生之所以取嫉于人者固其所以見稱于世者也昔歐陽公謂宰執可爲而唯翰林學士不可以輕授余則謂學士可爲而唯提學不可以輕授蓋士習之汙隆世道之升降由此其出也吾未

知河南廣東如何今南畿諸士去先生三十餘年猶若畏先生而不敢爲不善者此其爲益豈小補哉余因表先生之墓而重有感焉故特書其大者

胡松陽墓表

天下名實真僞之際何其相越之遠哉慨自大道風流古人不作通材秀民養交振譽而學問政事類多矯飾天下將何賴焉此余於胡松陽之墓所以特爲之表也松陽少與余同游郡學余見其聞人之善輒興向往雖課試末藝詞賦微長亦必手錄不遺及其應舉入太學多與四方名士結納而四方名士亦樂

與之游於是專意身心之學自家庭之燕接以至於
友朋之聚會每亶亶論學不倦恨不即見諸施行既
三試南宮不第乃慨然曰苟可以行吾之學亦何必
進士科哉遂就選知松陽松陽故巖邑也蒞任一以
古人之政行之豈弟慈祥從容和緩敦信崇禮節費
省役窮民咸德之至其抑中官怙寵之勢絕上官非
義之干正豪右犯禮之法則又不少假借監司方岳
初亦率多感動然而儉邪醜正直道難容竟以此去
松陽矣嗚呼古今天下此心同此理同孰謂世無君
子哉蓋有之矣然而徃徃委曲調停以取隆名顯位

如仲尼所謂色厲內荏者則寔未嘗寡也松陽顧能
實心向善銳意慕古而其名位反不能與若人等焉
是遵何說邪豈昔人直絃曲鈎道邊公侯之諺有固
然邪抑所謂非附青雲之士則名湮沒而不章邪然
松陽寧爲此而不爲彼此其人豈易得哉松陽姓胡
名雲字雨之別號霽齋世爲常州無錫人曾祖悅祖
轅父岳俱有隱德爲錫名家按狀蓋出宋安定先生
之後也靈長之緒淵源之學厥有自哉松陽生於成
化丙午四月二日領嘉靖戊子應天鄉試戊戌令松
陽三年而歸歸四年而卒卒之歲乃乙巳四月十六

日年蓋六十矣是歲十二月二十五日葬于西高山
祖塋之側子男四際可行可獻可求可際可行可俱
縣學生君嘗命就學于余葬之前三月君之弟露疏
君歷履率際可等遵君之治命請余表其墓余故知
君行誼之詳者然不能悉書也特表其大者以為世
風云爾

廣東按察使趙公墓表

代開石塘公作

嗚呼此故廣東按察使趙公墓也公葬時露澤王文
恪公嘗為誌銘以掩諸幽而墓前之石尚未有表之
者至是蓋垂四十年矣其仲子太學生禴以公嘗視

學浙江余為諸生受知於公詣請表之余因憶公歷
履并按其狀而書之曰趙公名寬字栗夫世為蘇州
吳江人曾祖銘黃巖典史祖瑛湖州梅溪局大使仕
皆未顯至公父某始以公貴累封刑部郎中母沈封
宜人公自少警敏風儀秀整為諸生時即以學行稱
吳中宿學多所推讓成化丁酉公甫弱冠舉應天鄉
試明年卒業太學王文肅公時為祭酒深加賞識文
譽日起辛丑會試南宮吳文定公司考校得公卷大
驚遂寘公第一刻其文以傳尋登進士上第授刑部
主事公初以文學名及是兼治律例靡不通析歷員

外郎郎中讞獄明允若素擅刑名之學者凡若干年
遷浙江按察副使提督學政躬行率人罔事口耳隨
才成就學者興起凡所品藻悉協衆望而一經指授
率爲名士在浙七年遷廣東按察使甫蒞任即決滯
獄禁和買約束鎮守中官嶺南士民方望其道之大
行未逾月竟以疾卒年僅四十有九某年月日其子
禧等護其喪歸吳葬茲橫山靈石峰之麓其配莫宜
人祔公居吳江學者稱爲半江先生今有半江集行
於世云子男三長即禧眉州判官次即禴以貢入太
學次福縣學生孫男四重嗣重道重文重科重道爲

吳縣學生類能好學克家以世其業嗚呼公之爲人
光明簡重操持自信不妄從人與人亦無所留隱亦
不恤人喜怒唯是以省元登第歷官且逾二紀僅爲
按察使以死茲可以觀公矣雖然余嘗觀宋自景祐
明道以來崇階膺仕者亦不爲少而歐陽文忠公表
安定胡先生之墓獨稱其爲當時學者之師而因及
於泰山孫明復徂徠石守道其於官之崇卑勿論也
乃今公之文章在士林政事在法曹而模範之著於
師道者則吾浙士人至今稱之公亦可謂不朽矣是
故表之非直成其子若孫之孝亦以慰學者之思也

徐雪井墓碣銘

漢太史遷稱范蠡治產積居分散與貧交疏昆弟此所謂富好行其德者也乃其人遠矣然聞其嘗往來于吳市門今吳市門襲其風流則有雪井徐君者云按狀君名燿字文彩別號雪井其先世爲江西南昌西隴鄉人宋淳熙間有名壽者以賢良徵典教常熟遂即其直塘里居焉迨元有名士瑛者爲錦城主簿士瑛生公大公大生淵淵生子三其季子朴善治生懋遷封殖業日以起初娶張生子炳繼娶李乃生君君性孝友弱冠值其兄以郡諸生遇例補太學父命

代兄赴部途次疾亟或勸之返君力疾竣事及父疾躬侍湯藥罔晝夜間居喪哀毀特至既終制追惟父業遂自奮勵相時權物積著盡變廉取厚蓄益大厥家故吳人之稱富者必曰常熟徐云初君家籍太倉間有不相能者君孫于長洲族人復有辭君曰利以和義遂以三千金分貽之歲歉應平糴令恣民所取其諸建醫局設義學振貧窮釋逋負修閭關補縣帑凡所施舍類皆不貲又奚啻三致千金而分散之邪教子務以義方勿縱逸勿過勞唯是其子履祥績學好修與余同舉甲午鄉試然君曠達知命豈直悉人

情之變遷泉貨之流布哉雖死生之際亦若寒暑晝夜之往來通復無少係吝歲丙申登晨臺山而樂焉因卜丘于其麓逾年己亥某月日遂卒距其生成化某年月日年凡若干娶張氏繼娶楊氏王氏子男四人長即履祥次履中履和履道女二人孫男女五人皆聯姻士族君卒之又明年庚子葬晨臺山之麓即君所卜藏也嗚呼昔鄒魯以曹邴氏之富多去文學而趨利此固無足道若君之好行其德而有范蠡氏之風其視高談異行之徒佯耻貨利往往攘攬潛喪所守者其賢否何如哉是君固可銘于墓上者也銘

曰玄宅疇封達士攸崇善必有后報施不窮來章寵錫尚賁幽宮我銘在茲用考厥終

鄒山人墓誌銘

余少爲郡學生時見山人在諸生中虬髯鵠立往往以能詩名余時方業程文山人每倡余詩余未之和間效漢魏間語答之山人輒弗懌曰詩以道性情何必乃爾故山人詩多所自得山人性曠達雅不好俗儒訓詁既爲諸生久之遂棄科舉業徧遊吳中諸名山駿駿有五嶽之志旋以體不柰勞尋復家居不出曰一丘一壑均可寄興何必效司馬子長之游哉遂

即其家之北建祠以像其始祖忠公浩且築道鄉臺以寓景行之思山人家故饒裕既爲公私所需乃日落殊弗介意日唯披鶴氅衣戴九峯巾吟哦以自適名其齋曰聽天自稱曰山人云山人姓鄒氏名承字文謨聽天即其別號也居常州無錫之塘莊曾祖元祖忠父觀皆有隱行娶華氏贈兵部職方郎中其之女生子男二同心娶陸氏同仁爲從弟紹之後娶華氏孫男女五人山人生于弘治戊申三月二十二日卒于嘉靖癸卯五月十五日年五十六卒之日正襟端坐無一言及家事徐謂同心等曰願薛考功銘吾

墓足矣是故同心服山人治命因其族兄鄉進士文徵詣余請銘余方懶於文未有以應也越明年甲辰同心將卜以十二月十八日葬山人于樂丘之原走留都官舍申銘者三余重憐山人之志且嘉同心之能藝文以世其家也遂銘之銘曰吁爾山人人亦有言美鬚則賢山人才志匪賢則然韜貞匿采永賁斯阡

陸東卿墓誌銘

廣東按察僉事陸君東卿既卒之又明年其仲兄辰卿率其孤集詣薛子請銘集稽顙泣曰吾父不幸死

矣吾父存時每對寮屬賓客及母子兄弟輒言自少
受先生之知公餘宴息輒誦先生之言以教集今墓
前之石非先生其誰銘哉余悲惟曩昔取友于鄉其
年之少于余者在武進則有唐君應德在無錫則有
陸君東鄉皆資性超越好問學能文章未幾應德以
禮部第一人登進士余與君則又流落不偶者五六
年至嘉靖乙未始同舉進士踰年君為中書舍人需
次調戶部員外郎郎中出為廣東按察僉事前後十
數年間督解遼陽軍餉巡視甲乙等十庫監收太倉
糧儲催理兩浙逋稅整飭嶺西兵備君隨所事事矢

謨宣力不為灼赫而權衡籌畫諸皆就緒惟嶺西居
東廣上游與蒼梧岑溪接壤叢山險隘猺獞往往出
沒流風鼓扇民多椎跣寇掠君初欲孚以誠信徐為
之圖既夷情叵測嘯聚竊發遂替提督叅總相機盪
定君體長神清倦勤輒病至是更有勞焉明年乘傳
入賀途次疾作至浙省頓劇竟卒于舟時歲丙午四
月二十七日也距其生弘治乙丑五月十三日春秋
纔四十有二年不滿德用未究才君子惜之君諱子
明東卿其字嘗以白菴扁其讀書之所既仕人稱為
白菴先生按陸氏自宋尚書左丞諱佃之子宗仕為

提舉由山陰徙居常州無錫之太湖桃墅寔生新城
令演再徙徐陶爲錫名家載傳有諱敬中者洪武初
徵爲禮部主事敬中生昌祚昌祚生綸綸生君之父
介以貢爲浙江天台縣學訓導調江西會昌縣學教
諭卒之日君方九歲今以君貴贈中書舍人中書初
娶鄧繼娶范亦各贈封孺人君乃范出溫雅淳厚不
落時格自零丁孤苦以取進士自布衣徒步以至方
嶽大夫不事驕矜不遺故舊居今之世有若君者不
可謂難乎君初娶施氏贈孺人繼娶謝氏封孺人子
男二長即集聘成次臬聘陳俱謝出女二爲施出者

嫁邵某爲謝出者受吳某聘葬之日爲嘉靖戊申冬
十二月十九日墓在邑之官山之原施孺人先君十
六年卒祔窆于石塘祖塋之次至是遷與君合兆於
乎君其已矣余於應德亦各稽違曠阻無復曩時矣
存亡聚散真如泡沫此吾於君之銘不能不重爲之
慨歎也銘曰大化流浪曰消與息人生幻化曰感與
寂其唯達人觀化齊物嗟嗟東卿生則成名死則完
璧始亦奚忻終亦奚戚悠然長逝返爾玄室吁彼衆
生及乃貪烈各隨所殉其將焉極我作斯銘勒爾貞
石

陶子沾墓誌銘

陶子沾生三十九年而卒卒十有一年而葬葬之先
一月其遺孤棟泣請于薛子銘其墓薛子子沾友也
感愴泫然因書以歸俾刻諸石嗚呼子沾已矣以子
沾之事觀之古今天下之士一才一節附青雲而顯
融當時聲施後世者不知凡幾其卓犖竒偉命世出
倫者顧坎壈終身名湮滅而弗彰也又豈少哉子沾
長身玉立氣性豁達甫弱冠即欲陵跨揚韓掩迹顏
孟嘗對鏡自言曰以若人而僅為近代人物非夫也
邑里儕輩遂目曰陶癡陶癡云乃子沾則寔不安於

凡品攻苦力學務究所志短褐衡茅啜粟飲水陶如
也久之貫穿經史而百家九流咸汎濫出入及發為
文章則又勁切工緻無蕪辭長語初游郡學有司召
之弗往選入國學祭酒司業亟問之亦弗私謁也既
舉應天鄉試再試禮部不第窮居一室柱門自樂飲
酒歌詩形影相答人以事干輒謝餽遺之弗受儕輩
乃始曰陶子其果為文章氣節之士哉至其妙悟本
原上窺聖學則固其所自得而未有知之者嗚呼子
沾蓋天下士也邑里交游尚淺乎知之况寰海士人
未識子沾者其又何以稱哉嗟哉子沾委骨原野蕭

然一丘不得與一才一節之士並馳於世謂有幸不幸者非邪雖然其與白髮蒙頭紆金橫玉而身集百詬以死者則亦有間矣子沾姓陶名澤子沾其字也從游者稱爲樸菴先生世爲常州武進名家其先居于橫山徙于郡城運河之南再徙城西之宋莊村曾祖某祖勗任寧海州知州父亮嫡母王氏庶母胡氏子沾乃胡出也生于弘治庚申八月二十六日卒于嘉靖戊戌五月十八日屬續時援筆致書以貽其生平友朋曰不意遂爲長別母老子幼望一視之餘無一言怡然而逝嗚呼死生之際整暇若此此不可以

觀哉所著有近思續錄古本孝經解樸菴稿若干卷藏于家娶徐氏子男一即棟聘吳氏女一適謝某君卒之年棟方七歲幼且貧弗克襄事今爲縣學生漸有成立遂卜地于白鶴溪之原以葬君君其有後矣乎葬之日爲戊申十有一月二十五日銘曰玉毀于璞孰爲圭璋金淪于礦孰爲干將孰云可遏終不可藏還諸造物返此大荒川流嶽峙日朗星光將與地久而天長

邵雲山墓誌銘

雲山邵君之卒也其冢子德令長興聞訃奔歸哀毀

踰禮卜地於黃沂之原奉君柩以葬先期泣血稽顙
請余銘君墓前之石余惟世道日趨民俗不古江左
風流常郡猶為近朴沿習既久亦遂好尚奢侈爭先
勢利其有矯俗者輒又於人情太遠民眩觀聽罔知
所措汗激相雜各務緣飾澆偽更甚武進無錫為常
屬邑五木當二邑之交寔為陬鄙吾薛與邵托居于
茲跨運河南北以相望世締姻戚唯先考功與雲山
君守身樂道課農教子世業不替而余與長興亦相
繼成進士鄉人慕效咸知耕讀晨夕阡陌犁鋤聯屬
桑麻蔭翳而絃歌誦讀之聲亦且徹于閭巷矣嗚呼

君於行輩雖後吾先考功而務本尚實敦化善俗君
蓋寔相媲美者也君今卒矣可無聞於後乎君名一
經字大常雲山其別號也世為常州無錫人曾祖瑜
祖洪出粟賑民例授承事郎父昱咸以仁厚禮義著
稱君性孝敬敦朴承考克家不事表飾服食器用務
從儉質尤習於稼穡凡水旱豐歉能先時知備築隄
濬流鄉人多利賴之方長興未第時值余修學於德
慶僧舍君令從余受易躬自勸率長興既游縣學文
譽日起君每戒諭勿以小成自安及長興舉嘉靖丙
午應天鄉試明年丁未第進士選授長興君更以遠

大勉之初長興欲奉君之任君乃曰縣令之職最弗
易盡汝其國爾忘家庶克有濟長興乃汝治民之邑
非汝私親之地也汝克供職以不負吾心其為養也
大矣長興服君之訓往即乃邑專心聽政倣古循良
士民愛戴稱賢令焉是君雖不仕寔於民物有造矣
君生于弘治辛亥八月三日卒于嘉靖戊申九月十
日年五十有八娶鄭氏子男三長即德娶胡氏次復
娶成氏次衍娶吳氏女二一歸武進戚某一受丹陽
姜某聘孫男五秉仁秉彛秉忠秉禮秉智孫女一聘
於同邑劉某葬之日即卒之年冬十二月十有九日

嗚呼昔史紀漢文皇時閭井年七八十翁皆嬉嬉然
如小兒狀蓋淳厚之氣所鍾也今以君之淳厚而顧
止於斯焉是遵何說哉豈畱其躬而豐其後邪抑造
物茫茫有不可以究竟也乃喟歎而系之銘曰嗚呼
生可欲也彼罔而生者祇以勞其形死可惡也此沒
而寧者乃以全其貞吁嗟乎君榮封可待上壽可登
而皆不膺于情有墳斯原葱龍鬱盤君其允安蓋與
元化而周旋

強處士墓誌銘

處士強君文華之卒且葬也其季子一鳳奉進士祔

明甫狀請余銘諸墓石余憶曩昔讀書德慶山房君
過余曰若欲讀書爲官人乎吾鄉讀書者未見其能
有成也久之過余曰君之讀書其爲官人不爲官人
皆未可知蓋異於吾鄉讀書者也遂遣一鳳從余游
君時命童子挈榼自携壺觴就余飲余以飲少辭君
輒自斟自飲醉即卸冠就禪榻卧鼻齁齁有聲及醒
乃謂余曰君其以我爲醉乎吾見世人之醒者耽戀
於功名富貴沉酣於聲色貨利頭出頭沒日昏昧而
不知是其醒也乃真醉也一日又過余值有貴客在
座立崖岸修邊幅君乃談笑諧謔如平時客既去君

復謂余曰若其以我爲癡乎吾見世人之儂者機械
變詐以爲巧趨趨囁嚅以爲能猿攀狐媚日勞頓而
不覺是其儂也乃真癡也余時尚疑其言謂豈有所
自得者乎及觀其居常率真任質不屑生產唯好觀
史書及朱子通鑑綱目每袖一卷編帙盡脫夏日坐
茂樹則爲親黨子弟談說歷代絕續及謀臣武將方
略或晡時出行畝畝與田夫野老相問答凡水旱豐
凶之驗及鄉閭間家世來歷咸能一一道之有當意
者輒携共飲飲必盡醉曰床頭釀熟此正吾適意時
也君與俗無忤唯見好訟者輒弗悅故終君之世鄉

族各安於田里而罕識官府者皆君所感也君非有所自得者邪君姓強氏名燦字文華別號養心按狀強之先自宋尚書名至者生子浚明由錢塘徙居常州無錫之五木數傳至基生錕錕生澹澹生承事郎椿娶鄒氏生子五人君行居四兄弟皆饒於貲而君獨清約茲亦可以觀君矣娶陸氏子男三長一龍次一麟次即一鳳府學生女二人孫男女五人曾孫女一人昏聘皆士族君卒於嘉靖戊申正月十三日年六十有七卒之年十二月丙寅葬於彭村祖塋之次嗚呼昔人稱漢陰老父江上文人士說者謂為寓言或

有所托而隱者也今以君觀之殆其人與是故可銘也銘曰古有至人抱朴含真逃名適志混跡同群嗟哉斯世寔唯有君君有子耕君有子讀以克厥家以綏後祿君樂斯丘永無樵牧

楊介石墓誌銘

余少時見無錫楊澹成先生博學好古嚴毅執持自舉進士以至棄官歸鄉里於人無間內外遠近罕所當意獨於其姪介石君則每每稱許謂其質任敦朴不同於流俗也余方業程文僑居于錫與澹成先生比隣嘗見君出入輒服生巾藍衫恂恂徒步或時游

息則緇冠布衣怡然自適學士大夫咸信澹成之言
而知君爲有道之器下至閭井童豎見君至輒相率
曰楊秀才來矣遂爭趨迎視或追而隨之蓋君貌古
色溫不徇物亦不忤物故能動人如此每過余必講
論理道旁究經子余嘗以古人目君君亦不以少年
視余唯時往來甚密既澹成卒君又屢試場屋不第
遂僻居坊前不入城市杜門讀易課農教子絕意進
取啜粟飲水晏如也晚年遣子榦從余受易余時時
詢君動止益知君所得更深方冀與君論質而君顧
逝矣榦受君遺命泣血稽顙請余銘諸墓石余遂按

狀書之君名江字大源介石其別號也晚又更號貞
靜居士楊之先江西吉水人宋建炎間有名邦又者
倅建康死節謚忠襄紹興初徵其子璿赴行在遂寓
居於杭璿生時澤時澤生宣義郎燧乃自杭徙居常
州無錫之鴻山燧生將仕郎宗達元兵至常州時與
仲子濟良逆戰死之宗達生震發咸淳九年進士爲
餘干州教授震發生文炳爲常州路判官文炳生璫
爲無錫州同知璫生謙洪武初補博士弟子員寔君
之高祖也代有聞人故人稱鴻山楊氏云謙生紀紀
生志志生壽壽娶華氏生君兄弟五人而君行居長

君之生寔嬰家落事父母必竭力共爲子職家事總
總一不煩諸兄弟諸兄弟性氣不齊君恒委曲其間
率皆雍睦諸有外侮君輒以身當之君之父未老即
安而諸兄弟垂老不識官府者君寔爲之也君雖處
匱乏而見義必爲族人有客死於外者返其喪而葬
之親友富貴者召君多弗往往亦弗利其有平生耻
談人過而樂勸人善每笑語中亦自有箴規之意凡
先世懿行及時事之善可爲法者輒書之所著有備
忘錄六卷君生于成化壬辰六月二十九日卒于嘉
靖丁未十月十二日壽七十有六卒之日惟以宗譜

世墓祖祠未及修復爲歎餘無一語嗚呼此亦可以
觀君之大都矣君初娶呂氏繼娶顧氏嚴重勤儉甚
宜其家先君二十九年卒寔正德己卯八月二日也
年才四十有三君念之乃不更娶子男三長渠次即
翰縣學生次斐孫男女各七曾孫男女各一昏聘皆
士族君卒之二年庚戌正月某日葬於邑之東瀆村
祖塋之次先是顧孺人祔葬梁鴻山麓至是啟與君
合兆云銘曰深山幽澤芝蕙自芳明月夜光未必盡
登于廟堂句吳之野有隱如君今之良士古之善人
乃竟抱璞以終厥身鬱鬱斯丘不亡者存嗚呼柰何

乎君

陳石村墓誌銘

石村陳君之卒且葬也其子忠言疏君歷履衰經詣
余匍匐稽顙泣而言曰先君葬有期矣忠言無似尚
未有以顯吾親願乞先生一言垂諸墓石既其師邵
進士明甫爲之申之且忠言亦嘗受易于余而石村
君固余所與知者其又何辭遂按疏書之君姓陳氏
名鳳字某初號古塘更號石村陳爲無錫著族南宋
時有之淵之才者兄弟同舉進士再傳至某勝國時
避地東海洪武初自嘉定復徙錫之山壩寔君之曾

祖也祖某以貢入太學歷官四川廣安州同知父周
登成化辛丑進士歷官河南布政司右叅政卒于官
君生纔四年稍長就學于其母舅華尚古君早年病
肺舅氏憐之命應例補德府引禮舍人君謝不往性
好書尤好吟咏漢魏六朝初中晚唐人詩無不涉獵
出遊遇佳山水輒徜徉忘歸四時乘興有浴沂風雩
之意築臺家之南植松其上題曰獨嘯時挂琴松間
風來自鳴危坐聽之故其發爲詩章多所自得至治
生則又經理有道未嘗以此廢世業也闢園植果時
自芟灌遇士大夫則折梅贈李歲致殷勤嘉靖初詔

舉賢良方正或謂君曰盍圖之君笑曰賢良方正顧可圖也往吳康齋推轂于石亨君子猶未愜焉吾何敢以此爲哉自是罕入城市疇昔交游稍稍辭謝時乘小舟扁曰采芳往來溪澗曰吾以此終其身足矣君性孝友慈惠每念不及事父謁祠堂則泫然泣下有從兄老無所歸時爲解衣推食其姊妹之有家者則問遺不絕教子則愛而知勞必遣從名師良友於鄉人之空乏者則務爲周恤雖傾囊弗靳嗚呼若君者可不謂今之隱君子乎君生于弘治己未某月日卒于嘉靖己酉六月二十一日年五十一卒之日作

書別諸親友且呼忠言教之敬慎當此病亟之時而周詳若此其亦不惑于死生之際矣所著有玉案山人吟稿藏于家娶華氏前光祿署丞珪之女子男一即忠言縣學生娶王氏女三長適秦進士梁次適縣學生華一夔次適胡同祖孫女三長聘於徐某次聘於王某皆士族次未聘忠言卜君卒之年十二月某日奉君柩于邑之某原銘曰嗚呼昔人有言不夷不惠居身之珍我觀斯世君寔其人謂君有官而君不曳裾于王門謂君逃名而君顧有聞於士林嗚呼君乎其殆有得於窮達顯晦之際而非拘方着相者之

可倫賁幽宮而不隨物化兮尚永徵于斯文

鍾廓菴墓誌銘

廓菴鍾君卒於吳江官舍其子崇文崇武扶君之柩將歸葬於其鄉之某原衰經啣哀持南兵部主事同野劉君狀詣薛子請銘薛子往署白鹿書院崇武嘗從問禮知君有素銘其容辭按狀君名任字重宣江西南昌人也鍾爲南昌著姓君之曾祖伯恭祖叔顯皆有隱德至君父光業朱氏詩爲邑博士弟子員初娶徐氏繼陳氏生君君生岐嶷襁褓時即善對耦弱冠籍名縣學紹父業已斬斬露頭角矣值父病目家

又重稅賦歲歉民多逋負君遂罄產償之日惟課子弟爲學故其二子暨諸子沂相繼登第弟賢亦廩於學君倜儻卓犖少善奕時寧濠方熾招致賓客藝士將以召君君遂斂跡不入城府屬又惡少賈濠之勢嘯聚村境爲民害鄰有熊婦者資粧爲諸惡攘奪輒自縊將絕君聞之亟往解懸且奮然力追所攘婦乃復甦惡黨銜之竟亦不能害君君之弟季繼母李出也將析居於外季不欲其外徙君遂以祖宅讓之而自居於外其篤於恩義類如此君蚤歲艱於得子及生二子時已年垂四十矣比長君乃謂吾鍾數世儒

業予愧不能光大吾今有子可愛而勿勞不竊附於
庭訓之義耶於是語崇文曰汝其學詩乎語崇武曰
汝其學禮乎二子承父之志各占一經游歌郡學並
以文行名于時嘉靖癸卯崇武以禮魁鄉薦庚戌舉
進士選授吳江知縣持廉秉正威惠並著士有師民
有父母君子歸君之教壬子崇文以詩舉于鄉一時
賢俊率先推讓二難趾美君教益彰方計偕上春官
君亦躍然有出游之興遂泝葛溪下桐江涉錢塘以
覽武林諸勝因觀政于吳江會崇武將述職乃留公
解君雖雅志江山自是蕭眉鑰不出手書岳武穆集

一帙賦詩二十餘章以需崇武北還忽疾作遂不起
癸丑正月一日也距其生為成化己亥五月一日享
年七十有五君平生力於為善置義田以恤宗祀修
橋梁以利民涉諸凡有益於人者不憚捐已為之晚
年更悟於往來消息之理而為善益堅唯是南昌稱
善人者必首舉君云君娶田氏生二子長即崇文娶
萬氏次即崇武娶胡氏女一適喻某孫男五為文出
者曰顏府學生娶樊氏為武出者曰孟聘陳氏曰曰濂
曰龍曰夔俱未聘孫女一亦武出納萬僉憲仲子某
聘嗚呼君以向往之學邁眾之才沮於家累格於世

用然不于其身于其後人而厚積餘慶於是乎足徵
矣宜其墓銘以為世勸銘曰人謂天道平分常與善
人又謂明德之後必有達人自古已然匪今斯今太
中不作明允久湮我懷若人非君其孰與倫洪都之
野有畢者墳封章寵錫行且滿臻我銘在石永世攸
聞

沈夷齋副憲暨配顧孺人墓誌銘

嘉靖乙未春余與夷齋沈君同舉進士初見于南宮
即歡然相入既復試 文華殿君入為翰林庶吉士
乃謂余曰仕以行志亦何必清華余頗訝其語既乃

携邸舍與余相近數數過余論學論政余益知其忠
厚正直不為世俗粉飾交游之態未幾余外補踰年
君亦散館授吏科給事中遂奮然以言責為已任上
疏請數御經筵日臨便殿懇懇數千言言涉于抗

上優容之薄謫浙江布政司照磨即素位循分承受
上官差委務勤幹濟時決滯訟賢明之聲徹于上下
君固不以曾歷中秘青瑣自矜人亦但知其能盡職
而忘其為謫官也既量移南國子監丞整約諸生有
文有實是時馬文簡公為祭酒今大學士南渠李公
為司業咸稱其賢數與講學論道若寮案然進南武

庫主事儀制郎中南曹多暇君益種學績文時出登山臨水意豁如也及陞承天知府遂經理庶務築堤捍水抑強扶弱威惠並行闔郡懷服一切營建悉心區畫制使不勞間井不擾工獲就緒 上優賞之陞浙江按察副使巡視海道初近海勢家交結任俠通番賈利習以為常往往為之嚮導殺人劫財官府稍設防禦輒以捕魚採薪為辭多方妻非必致其去位乃已唯是官茲上者雖知其奸亦率隱忍以延歲月不敢摘發君至下令敢有犯者必如例處以極刑全家戍邊乃竟蒙譖被論改調廣東副使履任甫半載

政事籍籍有聲雖猺獞亦知感化壬子秋入賀寓京邸聞黃巖為海寇所陷浙東沿海諸處焚掠幾盡君仰天歎息憤懣不平者久之忽疽發於背以卒卒時顧謂其僕曰吾上負報主之心下不能終母之事餘無一言嗚呼君之志意可悲也哉先是君之配顧孺人卒於官歸其喪尚在殯至是其子敷言迎君之柩卜以明年癸丑冬十二月甲申將合葬於其鄉黃坡之新塋君之壻吳江縣學生顧曾瑜嘗從余受業敷言偕以詣浙奉君弟涑之狀請銘于余余固知君者銘其容辭君諱瀚字原約夷齋其別號也世為蘇州

吳江人曾祖政祖達皆有隱德父珙以君貴贈吏科給事中母李氏封孺人生子四君其長也君自少岐嶷秀穎氣志不凡尤為給事公所鍾愛遣從名士游弱冠為縣學生即有文譽年二十四值給事公喪諸弟皆幼家值空乏君哀慟迫切竭力營葬既乃授徒治生不憚勞苦教養諸弟曲盡恩義雖為之兄實有父道戊子舉應天鄉試悉以先世產業暨諸所遺推與諸弟而一無所取及登進士所得俸資乃又分遺故居官十有八年位歷方面四品而薄田不過五頃君之大都於茲益可推矣配顧氏汝寧知府曷之妹

在室故豐裕及歸君勤儉孝敬而麻泉酒漿之屬悉躬執勞勩雖受封孺人龜勉一如往時君得遜志於學殫心於官者皆其助也君生於弘治丁巳七月二日卒之日為嘉靖壬子八月十一日年五十六顧孺人生於弘治己未七月三日卒之日為嘉靖壬子三月四日年五十四子男一即敷言國子生娶張氏女一壻即顧曾瑜孫女三長聘於曹僉憲孫大夏次聘於吳工部郎孫燭次幼未聘嗚呼君始以一官之故奔走南北而夫婦各殞於異地然終克同穴以藏生順死安亦何憾哉銘曰人才難得自古已然然而有

才者又多不得究其才無志者多舉世通患然而有志者又每恨於賈其志吁嗟乎君志存匡世才本出群方成輒毀幾至沉淪誰其尼之有天者存人心不死長世令聞

方山先生文錄卷之二十一

